

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Nos a drenta e siman di eksamennan pa tantu VSBO komo Havo/Vwo. Tin mayor ta sinta puntra nan mes ta kon lihé e hóbennan aki a krese te ku nan ta bai finalisá un etapa importante di skol. Bo ta mira kon nan ta bira independiente i mas outonomo den tur kos ku nan ta hasi. Nan mes por soru pa nan mes, nan por sali nan so, nan tin nan opinion. Hopi biaha nan opinion ta liña rekta kontra di bo. Bo ta puntra bo mes tin biaha si bo a asi algu robes mirando nan reakshon. Nan ta buskando nan mes identidat. Skucha nan i hasi pregunta na nan. Diskuti ku nan a manera lo bo hasie ku bo amiga. No diskuti ku nan ku outoridat paso abo ta nan mayor. Bo a perde nan i bo no ta yuda nan forma nan mes idea i opinion. No imponé bo opinion, esei ta stroba nan desaroyo. Naturalmente ku reglanan di bo kas ta di bo. No por ta asina ku bo ta bisa nan ku nan mester hasi trabounan na kas i nan ta opiná ku esaki ta pa abo so i nan ta turista den kas. Tampoko no ta asina ku nan por hasi e deshasí manera nan ke. Nan mester sa ku tin regla i unda ku nan bai esei lo keda eksistí paso sino koso ta crash. Pero te hasta e reglanan bo mester por splika dikon nan tei i kon nan ta sirbi tur hende. Pero si nan diskutí riba un tópiko ku bo tende i respetá nan opinion. Skucha mas tantu pa bo komprondé origen di e opinion aki. Kiko nan ta pensa di derecho di ekspreshon, dikon nan ta pensa asina. Kiko nan ta pensa di refugiado i dikon nan ta pensa asina. Tin artikulo ku bo por manda nan buska pa amplia nan opinion. Duna tempu ora por. Tin hopi biaha nan mester madurá, lo bo mira ku nan ta adaptá nan ideanan segun añanan ta pasa. No paso abo a obligá nan pero madures ta e miho lés di bida. Duna tempu tempu paso imponé no ta yuda nan madurá. Pasenshi i perseveransha ta e mihó instrumentonan. Duna kuadro, fir e liña poko. Ranka pone stret ora mester, kaba bolbe fir. Pero no keda sin komuniká. Komuniká kier men skucha i puntra. No ke men ras den nan kabes oras sin interkambiá. Un felis wikènt pa boso.

Riba roster

Radulphus College a bolbe organisá 2 biaha di orientashon eksitoso pa studiantenan den e pre aña di eksamen di tantu Havo komo VWO.

Nan a bai Hulanda den e HBO tour, bishitando diferente skol na hulanda i asina haña tur informashon pa nan ta prepará si dado kaso e hobennan ku kaba Havo skohe pa studia na Hulanda.

E WO tur tabata pa esnan den VWO 5 pa nan orienta riba posibilidatnan despues di kaba nan VWO. Tur dos biahe tabata eksitoso i a duna e studiantenan tur informashon nesesarario pa nan por hasi un mihó eskoho.

Un danki na tur e skolnan aya i tur persona ku a kontribui pa hasi e biahe aki fruktífero. Kas di Korsou, tur universidat i Hoge school i tur studiante aya ku a duna un man den organisashon di e dianan di informashon. Un danki tambe na e kordinadónan di e biahanan aki, na kada dosente mayor i studiante ku a kontribuí na e èksito.

E potrètnan ta duna un bista di e biahenan aki.





Not'é riba bòrchi

MIL a bishitá Colombia ku su studiantenan pa asina nan siña konosé e kultura di e pais. Nan a enterkambiá riba hopi tema ku e habitantenan pa asina enrikesé nan mes. Un danki na tur ku a koperá pa e biaha aki bira eksitoso. Na e kordinadó, e dosentenan, mayornan i e hóbennan. Nos ta spera ku e eksperensha aki ta di balor pa bosu.





Den agènda

Hemelvaartsvakantie 10 (liber nashonal) i 11 mei
Dia di bandera 2 juli (liber nashonal)
Fakansi grandi 9 juli t/m 14 ougustus.

Riba rapòrt

Joseph Civilis ta ekselá.

Joseph Civilis VSBO/AGO, e úniko skol avansá na Banda Bou ta sigui bria riba diferente tereno i esei ta motibu pa ta orguyoso. Durante e kompetensha di Arte di Palabra, na Aruba kaminda ku Boneiru i Aruba tambe a kompetí, Derickson Ellensburg a sali ganadó apsoluto den kategoria di Kuenta Eksistente i Ruvienca Estachia a sali ganadó apsoluto den e kategoria di Kuenta Original.

Algun alumno a partisipá na e proyekto patrosiná pa Fundashon Bon Intenshon. Bou di guia di dosentenan di IBBB i Sharelly Emanuelson nan a graba un pelíkula kòrtiku titulá: 'Juni'. E pelíkula a keda estrená durante e siman di Festival di Sine organisá pa CIFFR ku a tuma lugá na Cinemas. Nan a demostrá ku nan ta determiná i motivá pa krea un produkshon na nivel haltu.

Riba e tereno deportivo tampoko nos alumnonan no ta keda atras. Durante e kompetensha organisá pa FDDK e ekipo di futbòl maskulino a sali kampeon i esnan di futbòl femenino a sali na di tres lugá. Ademas e ekipo di Futbòl Femenino nan a sali esnan Mas Disipliná durante henter e kampionato. Stanley van Blarcum a sali e hungadó Mas Disipliná. Tur e logronan sin mas ta motibunan bálido, pa nos sigui kere den nos yunan di Joseph Civilis VSBO/ AGO.





Mucha djispou

Papa: “Angelina bo ta bai pasa eksamen di rijbewijs sin habri e buki. Si bo druij, hasi manera bo no konosemi. Paso no ta tike sèn ma paga pa e lèsnan ei.”

Su manisé ora e sali èksamen e ta drenta outo di su tata:

Angelina: “Muchu gusto, mi nòmber ta Angelina, ku ken mi tin e honor?”